

守護國界主陀羅尼經卷第七

蘭七

唐罽賓國三藏般若等譯

入如來不思議甚深事業品第五之三

爾時世尊復告文殊師利童子菩薩摩訶薩言善男子如來意業智爲先導隨智慧轉云何意業隨智慧轉善男子如來無有心意識過何以故如來心意識俱不可知但從佛智而顯現故如來智慧而爲主故善男子如來智慧隨順一切衆生心轉隨順趣入諸衆生意隨順解了諸衆生識出生諸法及諸三昧

是故如來心意識等無能知者超過因地遠離緣生非三有道解脫諸慢諸魔事業詭詐幻惑我我所執愚癡無明黑闇翳障默修道品而無散亂無所分別入平等性猶如虛空有如是等無量事業一一皆以智爲先導是爲如來第二十九正覺不共甚深事業爾時世尊欲重宣此義而說偈言

兩足尊心不可量 淨智因緣世中勝  
佛智等同於法界 隨順普入衆生心  
禪定解脫悉皆圓 心意分別無搖動

超過魔境及魔業 無垢無變如虛空

復次善男子如來正覺見過去世無著無礙  
智慧隨轉智云何轉所謂過去種種佛刹顯  
現成壞無量無數如來悉知彼諸刹中卉木  
叢林藤蘿藥草如來悉知彼刹所有衆生之  
類卵生胎生濕生化生有色無色有想無想  
非有想非無想如是一切如來悉知彼諸刹  
中有情非情種種音聲如來悉知彼刹所有  
如來出現說種種法種種衆會比丘比丘尼  
優婆塞優婆夷一切衆生於三乘中各得調

伏種種壽量種種法住如來悉知彼諸衆生  
出息入息種種飲食種種資具種種相貌種  
種根器種種行解種種心性死此生彼刹那  
流注生滅相續如來悉知如是一切現量所  
得非比量知云何現量謂不動念如實而知  
非流注心入於過去如是知時智慧具足隨  
蘭七  
衆生心種種說法是名如來第三十正覺不  
共甚深事業爾時世尊欲重宣此義而說偈  
言

佛智無量無所著 知過去刹佛衆生

說法大會名相殊 心行根欲多差別  
各依三乘得調伏 究竟同歸解脫源  
及知生滅流注心 一切見者真實覺  
復次善男子如來智慧見未來世無著無礙  
如見現在此云何見謂所有未來種種衆生  
種種諸法種種刹土當生當滅曾住當住如  
是一切如來悉知所有刹劫當燒當盡當成  
當住刹中當成所有諸地樹木叢林百卉藥  
草麞色細色日月星宿乃至微塵皆如實知  
一一刹中諸佛當現當有聲聞當成緣覺當

成菩薩當有資具出息入息往來進止取與  
威儀如來悉知種種刹中如是衆生當得解  
脫於三乘中解脫差別如來悉知又彼刹中  
一切衆生所有諸蘊諸入諸界心心所法當  
生當滅如來悉知雖於一切皆如實知而如  
來心亦不流注入於未來爲今衆生悟未來  
性說如是法是爲如來第三十一正覺不共  
佛七  
甚深事業爾時世尊設重宣此義而說偈言  
佛未來世無垢眼 偏見所有已當成  
一切諸佛及刹中 無有纖毫知不盡

彼彼事中無錯亂復細觀見未來因  
隨衆生心說法門此兩足尊超勝業  
復次善男子如來知見現在無著無障礙轉  
此云何轉謂於十方現前所有一切佛刹以  
三種因微細知見謂知其相若生若滅知何  
等法謂一切諸佛一切菩薩一切聲聞一切  
緣覺一切細色一切麁色如來悉知一切地  
界微細分析各以若干微塵所成一切水界  
以毛滴之知其數量一切火界談之起滅悉  
知其數一切風界色相飄擊若干微塵十方

虛空以一毛端周徧度量知其邊際如是等  
境盡知其相亦知其生亦知其滅亦以三種  
知衆生界知地獄界生地獄因出地獄因知  
畜生界生畜生因捨畜生因知談摩界談摩  
生因談摩滅因知於人界生人趣因失人趣  
因知諸天界生天之因天退沒因如是一切  
如來現前皆悉了知知諸衆生心之流注有  
煩惱心無煩惱心若干衆生諸根調伏若干  
衆生諸根不調如來悉知如來如是於現前  
境無二智轉不二現行亦爲衆生如是宣說

是爲如來第三十二正覺不共甚深事業爾  
時世尊欲重宣此義而說偈言

如來境界無邊際 不可思議不可稱  
無有等等如虛空 一切衆生豈能測  
十方所有衆生類 現前境界事業殊  
○  
如來一切悉能知 最勝自然之智業  
善男子此三十二如來甚深事業諸佛皆悉  
具足圓滿爲欲調伏一切衆生令其悟入略  
說少分而實如來所有事業無量無邊非可  
宣說善男子如來復有真實事業無有分量

不可思議一切世間所不能測一切文字所  
不能宣一切心識不能解了一切智慧不能  
趣入周徧一切安立刹土隨順一切佛平等  
智超過一切世間事業種種施爲而無所作  
體性平等猶如虛空法界現前無有分別何  
以故善男子諸佛世尊顯示法界無二性故  
種種諸法種種衆生種種刹土種種心識種  
種解脫種種涅槃如是諸法若體若相畢竟  
空故善男子如來如是自覺法界一味無相  
離因緣法欲令衆生平等悟入猶如虛空無

礙法故爲諸衆生轉不退轉無上法輪善男子譬如巧匠善能磨燃摩尼妙寶善知寶性採之山石以乞又羅藥用水塗磨以殺羊毛綵以瑩拭瑩拭不已又以別藥名利醋味和水潤之輒木揩拭功猶未已復用摩訶薜舍遮藥以微細物而瑩拭之尚未有光便入熾火焚燒七日餘石礦穢一切銷除知非假寶名爲無價摩訶瑠璃摩尼妙寶善男子諸佛如來亦復如是知諸衆生愛樂生死不淨垢穢爲說無常苦空無我不淨之法令生厭離

入於聖法調伏身心如是如來精進未息次爲說空無相無願故令其知覺悟佛眼如來精進亦復未已次復爲轉不退法輪如來精進亦未休息最後爲說三輪清淨如來境界今諸衆生明了因緣見法本性乃至普入一切如來平等法體善男子是故汝等應如是解不可思議如來事業若諸菩薩安住於此不可思議如來事業雖於諸法心得平等而隨順知一切諸法離諸過失雖能隨順三世平等而不斷絕三寶種性雖知身性猶如虛

空本無搖動而於十方一切佛刹普現其身  
雖知諸法體不可說而以語言出隨類音說  
一切法雖隨衆生心行不同說諸因緣而離  
衆生及諸法相善男子諸佛如來爲欲清淨  
菩薩心故出興於世而實如來無有變異常  
住於此難思事業不捨精進授菩薩記說法  
不斷爾時世尊說此如來難思事業深法門  
已十方無量阿僧企耶出過算數諸佛刹土  
地六震動放大光明雨衆天華此大會中諸  
大威德無量菩薩欲色諸天南閣浮提十六

大國及諸小王龍神夜叉乾闥婆阿修羅迦  
樓羅緊那羅摩睺羅伽人非人等及比丘比  
丘尼優婆塞優婆夷聞此法門心淨歡喜踊  
躍無量以諸供具供養於佛所謂種種妙華  
種種名香塗香林香衣服瓊珞幢旛鬘蓋以  
爲供養或以種種微妙音聲歌詠讚歎恭敬  
供養或以頂上髻中明珠額上明珠耳璫頸  
第七  
珠而用供養或以摩尼妙寶瓊珞真珠瓊珞  
月形瓊珞嚴諸身分種種瓊珞寶鎖寶印寶  
剉寶環寶鏡寶帶寶薩寶冠衆妙衣服種種

嚴具諸妙鈴鐸俱散道場恭敬供養或以種  
種妙寶供養所謂吠瑠璃寶闍浮洲寶阿濕  
摩孽摩寶室利孽摩寶因陀羅尼羅寶紅頤  
眼迦寶如火色寶火燄光寶無邊色寶如是  
等寶奉獻於佛以為供養復有衆生以金銀  
等種種寶林而為供養或以沈香多伽樓香  
隨時之香妙栴檀香龍華鬚香赤真珠香以  
如是等種種香林而以奉散或復有散種種  
天華以為供養所謂波利耶怛羅迦華曼陀  
羅華摩訶曼陀羅華曼殊沙華摩訶曼殊沙

華盧遮迦華摩訶盧遮迦華薩陀<sup>聲</sup>羅華摩  
訶薩陀<sup>聲</sup>羅華<sub>七</sub>研羯羅華無垢研羯羅華百  
葉華千葉華百千葉華普光華普香華光燄  
華最勝華無邊色華大普徧華愛樂見華而  
以供養或有衆生散陸生華所謂縛哩色枳  
華蘇曼那華拘蘇摩華阿提目多迦華瞻博  
迦華阿輸迦華駄努色迦哩迦華波吒羅華  
目真隣陀華摩訶目真隣陀華或有衆生以  
水生華奉散供養所謂優鉢羅華波頭摩華  
拘物頭華芬陀利華散如是等種種妙華供

養於佛一切諸天於虛空中奏諸天樂清雅  
寥亮微妙音聲以爲供養所謂簫笛笙簧琵  
琶螺貝種種天鼓美妙聲鼓絃種歌舞恭敬  
稱歎供養於佛復兩種種天諸妙華種種抹  
香種種妙寶種種瓔珞種種衣服如是微妙  
諸天供具供養於佛爾時十方所有世界諸  
大菩薩摩訶薩衆俱來集會及此衆中諸菩  
薩<sub>皆</sub>爲供養佛皆昇虛空各各變身作天形  
像纔變身已菩薩力故以衆寶網徧覆大會  
其網周匝遶菩提樹於其四面各四由旬皆

厚八步種種真珠瓔珞周垂懸衆網鐸寶鈴  
和鳴衆寶蓮華以爲校飾其珠瓔珞一珠  
中皆有無量無數菩薩俱時出現現已恭敬  
遶佛七匝遶佛畢已爲諸菩薩一一各化衆  
寶蓮華師子之座爾時十方無量佛刹一一  
如來皆以自在威神力故各令如意寶樹寶  
網及諸希有殊特供具平等普至娑婆世界  
菩提樹下羅列寶樹周匝圍遶分布供具莊  
嚴道場爲欲供養釋迦如來及此經故作此  
莊嚴供養之時此會無量無數衆生發阿耨

多羅三藐三菩提心無量菩薩得無生法忍  
爾時世尊普觀一切菩薩大眾作如是言諸  
佛子等誰能發起廣大誓願以大威德能留  
於此不可思議種種妙寶莊嚴道場瓔珞網  
卷七覆菩薩住處及十方來諸如意樹華葉間列  
發燄舍輝常無變易待彌勒佛下生之時年  
方十六坐於道場正覺始圓說此守護國界  
主經開示演說此陀羅尼當爾之時以伸供  
養乃至賢劫千佛出現亦復如是以爲供養  
說是語時於此會中有一菩薩名神通自在

王於蓮華座整身威儀右膝著於蓮華之臺  
恭敬合掌而白佛言世尊我能如是如佛教  
勑留此道場供養慈氏乃至賢劫一切如來  
應正等覺爾時會中有神通魔名妙建立住  
四大洲聞此語已即白神通自在王菩薩言  
聖者以何等器安置於此衆寶瓔珞莊嚴道  
場經爾所時令不損壞時神通自在王菩薩  
語彼魔言仁者當知一切器物速疾破壞多  
諸障礙虛空爲器不可損壞無有障礙一切  
器中此爲最勝汝勿瞬目諦觀我身自當見

我廣大之器魔如其教諦觀菩薩見菩薩身  
齊輪之中有一世界名水光王謂此世界大  
水彌漫猶如大海故立其名於此界中有一  
如來名吉祥寶蓮華如來應供正徧知明行  
足善逝世間解無上士調御丈夫天人師佛  
第七  
世尊唯有清淨大菩薩衆於其水中彌漫生  
於衆寶蓮華吉祥如來坐寶華王諸菩薩衆  
俱坐寶華恭敬圍遶時彼如來於大衆中說  
深妙法示教利喜時神通魔見是事已即起  
合掌恭敬禮拜神通自在王菩薩爾時菩薩

而告之言仁者見於菩薩如是廣大器不魔  
言已見奇哉大士能辦是事如是大器百千  
俱胝那由陀劫亦不可壞故此大寶莊嚴道  
場任持無缺無垢清淨無有變異于何不可  
時神通魔說此語已頂禮佛足而白佛言世  
尊我自思惟於過去世未曾見此神通自在  
王菩薩神通之事未曾聞此法門之時於聲  
聞乘勤行精進欲出三界自求涅槃我於今  
日見聞是已便於阿耨多羅三藐三菩提發  
起決定極深重心世尊設令我於恒河沙劫

處大地獄受種種苦然後得成阿耨多羅三藐三菩提我甘此苦終不捨於菩提之心爾時世尊稱讚魔言善哉善哉汝大丈夫能於阿耨多羅三藐三菩提被大甲冑不久亦如神通自在王菩薩具足圓滿一切功德

菩薩瓔珞莊嚴品第六之一

爾時十方種種佛刹諸來菩薩及此大會天龍夜叉乾闥婆阿修羅迦樓羅緊那羅摩睺羅伽人非人等及比丘比丘尼優婆塞優婆夷心生渴仰欲聞妙法爾時世尊知此衆會

心之所念樂欲聞法堪持法藏歡喜怡暢復欲重爲開示顯示說守護國界主陀羅尼經放大人相無見頂光此光名爲不捨精進光徧遶此菩薩大會經七帀已復遶文殊師利童子百千萬帀作是事已入文殊頂其光入已令文殊身及其所處師子之座威德光明過於大衆百千萬倍猶如滿月映奪衆星爾時文殊師利童子蒙佛威神即從座起偏袒右肩胡跪合掌讚佛功德而說偈言

佛放身智大光明 普眼見盡無餘義

本性自然諸善巧  
不思議德悉皆圓  
丈夫牛王放大光  
普照徧淨於三業  
遶我經於百千匝  
總持光照皆微劣  
我昔智慧及辯才  
人天主光纔觸我  
清涼我身淨我心  
踊躍歡喜皆平等  
佛智妙辯無邊際  
悉皆流入我身中  
如來威德量難知  
少力不能持念此  
承佛智力今諮詢  
爲欲利樂諸衆生  
爲入菩薩諸行門  
復令諸佛出興世

神通放光灑頂智  
此衆集會廣無邊  
餘未得者傾心念  
願無等智順時機  
魔王眷屬當摧殄  
於如來教善修持  
大雄智慧無有邊第七  
而我智慧不能了  
是故諮詢於如來  
世尊智慧如實知  
於無量劫長時轉  
曠劫勤修今自在  
願開佛智示衆生  
爾時文殊師利菩薩說此偈已白佛言世尊

如來境界不可思議非是菩薩稱量境界而  
佛智慧說法無倦大悲憐愍不捨衆生故我  
承力敢欲諮問世尊云何名爲菩薩瓔珞云  
何菩薩瓔珞莊嚴云何菩薩得殊勝行云何  
菩薩得不思議妙法光明遠離愚闇及諸疑  
惑云何菩薩得於如來大法明門悉能清淨  
善哉世尊惟願爲我決定宣說諸菩薩衆出  
生法門若諸菩薩得聞此已能破諸魔煩惱  
寃敵入一切法永無疑惑現前了知如來境  
界漸次深入諸菩薩境復能漸入一切智境

知衆生心淨衆生行遊諸佛刹摧伏魔軍速  
能攝受一切佛教於一切法自在而轉爾時  
世尊告文殊師利菩薩言善哉善哉善男子  
汝能發起大勇猛心作師子吼問於如來如  
是妙義汝已能於一切如來無量境界明了  
通達能問斯義善男子諦聽諦聽善思念之  
吾當爲汝分別解說如是境界及餘無量諸  
功德法自在而轉文殊師利唯然受教佛告  
文殊師利言善男子一切菩薩皆悉具有四  
種瓔珞云何爲四所謂戒爲瓔珞定爲瓔珞

慧爲瓔珞陀羅尼門以爲瓔珞是名爲四善  
男子云何名爲戒爲瓔珞善男子菩薩有一  
淨戒瓔珞謂於衆生起無瞋恚無障礙心令  
諸衆生見皆歡喜無有厭足復次善男子菩  
薩有二淨戒瓔珞所謂閉惡趣門開人天路  
七  
復次善男子菩薩有三淨戒瓔珞謂身口意  
復次善男子菩薩有四淨戒瓔珞  
十二  
謂所欲皆遂所願皆成所樂皆得始終究竟  
復次善男子菩薩有五淨戒瓔珞謂具足三  
昧具足智慧具足解脫具足解脫知見具足

大般涅槃復次善男子菩薩有六淨戒瓔珞  
謂不破戒終無悔故不穿漏戒無餘過故不  
雜戒無和合故清淨戒長白法故自在戒隨  
意所往體具足故自在轉戒於一切時智自  
在故復次善男子菩薩有七淨戒瓔珞所謂  
施得清淨忍得清淨勤得清淨定得清淨慧  
得清淨方便得清淨不放逸得清淨復次善  
男子菩薩有八淨戒瓔珞各別圓滿所謂十  
地圓滿不悔圓滿不懈怠圓滿不嫌恨圓滿  
供養佛圓滿離八難圓滿修布施圓滿得善

友圓滿復次善男子菩薩有九淨戒瓔珞云  
何爲九所謂得無所畏得無驚怖得決定心  
得近寂靜得調伏心得無貪心得勇悍心得  
知一切衆生心念得寂靜地是名爲九復次  
第十七  
善男子菩薩有十淨戒瓔珞云何爲十所謂  
身瓔珞圓滿相好爲莊嚴故語瓔珞如說修  
行爲莊嚴故意瓔珞以無煩惱爲莊嚴故刹  
土瓔珞以圓滿願爲莊嚴故利佗瓔珞能清  
淨心爲莊嚴故生處瓔珞不造諸惡爲莊嚴  
故菩薩行瓔珞隨學佛行爲莊嚴故智慧瓔

珞了一切法皆悉幻化爲莊嚴故菩提場瓔  
珞一切善根皆悉迴向爲莊嚴故力無所畏  
佛不共法以爲瓔珞不捨淨戒根本體性爲  
莊嚴故是名爲十善男子云何菩薩修諸三  
昧瓔珞莊嚴善男子菩薩有於一種三昧瓔  
珞莊嚴云何爲一謂於一切衆生界中發起  
慈心善男子菩薩復有二種三昧瓔珞莊嚴  
謂質直心及柔軟心菩薩復有三種三昧瓔  
珞莊嚴所謂非幻非詭非假菩薩復有四種  
三昧瓔珞莊嚴謂不隨順欲不隨順瞋不順

於癡不順於怖菩薩復有五種三昧瓔珞莊嚴所謂斷於五種障礙一者愛欲二者瞋害三者昏沈四者掉悔五者疑心斷此五蓋以爲莊嚴菩薩復有六種三昧瓔珞莊嚴謂念佛念法念僧念戒念捨念天菩薩復有七種三昧瓔珞莊嚴謂不忘失菩提之心隨順修學七菩提分謂念覺分擇法覺分精進覺分喜覺分輕安覺分捨覺分定覺分菩薩復有八種三昧瓔珞莊嚴謂八聖道正見正思惟正語正業正命正精進正念正定菩薩復有

九種三昧瓔珞莊嚴云何爲九善男子此菩薩心無有忘失大悲威力不捨衆生修習建立九次第定謂離欲惡不善法有尋有伺離生喜樂入於初禪得圓滿住除滅尋伺內淨一心無尋無伺定生喜樂入第二禪得圓滿住離喜住捨有念正知身受樂諸聖所說能捨有念受樂入第三禪得圓滿住斷樂先除苦憂喜已滅不苦不樂捨念清淨入第四禪得圓滿住超一切色想滅有對想不念種種想入無邊虛空於空無邊處得圓滿住超過

一切空無邊處入無邊識於無邊識處得圓滿住超一切識無邊處入無少所有於無所有處得圓滿住超過一切無所有處入非想非非想處於非想非非想處得圓滿住超過一切非想非非想處入滅受想定於滅受想定得圓滿住如是善巧方便力故真際現前由先減力於此安住然後利樂一切衆生隨諸法門令得成熟是名菩薩九種三昧瓔珞莊嚴善男子菩薩復有十種三昧瓔珞莊嚴何等爲十所謂法性無亂故妙定圓滿故不

捨精進故常樂寂靜故不斷善根故心不散亂故身得安樂故觀察諸法故得心自在故得聖種性故善男子此是菩薩十種三昧瓔珞莊嚴善男子云何名爲菩薩智慧瓔珞莊嚴善男子菩薩摩訶薩有一智慧瓔珞莊嚴問七十五云何爲一所謂一切法中斷除疑惑復次善男子菩薩復有二種智慧瓔珞莊嚴謂遠離惡作現起煩惱等菩薩復有三種智慧瓔珞莊嚴謂除愚癡破無明藏除去黑暗菩薩復有四種智慧瓔珞莊嚴謂知苦智慧斷集智

慧證滅智慧修道智慧菩薩復有五種智慧  
瓔珞莊嚴謂戒蘊清淨戒體如空不可得故  
定蘊清淨發勝智慧超動念故解脫蘊清淨  
一切諸法體無二故解脫知見蘊清淨了知  
三世體平等故法蘊清淨諸法體性無染著  
故善薩復有六種智慧瓔珞莊嚴謂布施波  
羅密多三輪清淨謂我輪清淨知我如幻體  
平等故衆生輪清淨了所化生皆如夢故善  
提心輪清淨不求世間異熟果故淨戒波羅  
密多三輪清淨謂身輪清淨猶如鏡像體平

等故語輪清淨猶如谷響體平等故意輪清  
淨了心如幻體平等故安忍波羅密多三輪  
清淨謂離瞋清淨忍受麤惡加毀辱故離愛  
清淨斷於稱讚敬養等故斷支節清淨觀察  
法身體無二故精進波羅密多三輪清淨謂  
無功用清淨觀察生死猶如夢故堅固清淨  
心如金剛不可壞故捨清淨超過諸相無取  
捨故靜慮波羅密多三輪清淨謂本性清淨  
無轉智故妙觀清淨無執著故因緣清淨生  
神通故方便波羅密多三輪清淨謂財攝清

淨成熟一切衆生界故總持清淨受持一切妙法門故大願清淨莊嚴種種淨佛刹故菩薩復有七種智慧瓔珞莊嚴所謂無念智慧住於離念四念住故無生滅智住正斷故身心寂靜住神足故具知根智住諸根故推破四魔住諸力故知法本性住七覺故知去來智住八聖故菩薩復有八種智慧瓔珞莊嚴謂知妙上智入寂靜故知深觀智無翳障故知諸蘊智悟法蘊故知諸界智空平等故知諸處智了空聚故知因緣智住無我故知真

諦智心無亂故知獸離智如實觀察真實法故菩薩復有九種智慧瓔珞莊嚴云何爲九謂知過去智前際清淨故知未來智後際清淨故知現在智中際清淨故知正定智因無滅故知不定智緣和合故知邪定智邪業成故佛平等智法身德故法平等智法無染故僧平等智無爲德故是名爲九菩薩復有十種智慧瓔珞莊嚴何等爲十所謂知如幻智積集相故知如夢智分別相故知如談智輪轉相故知如像智不往來故知如影智因緣

合故知如響智緣起相故知法界智不可壞故知真如智無住相故知真際智湛然淨故知有爲智無爲性故是名爲十善男子是名菩薩十種智慧瓔珞莊嚴善男子云何名爲一切菩薩陀羅尼門瓔珞莊嚴善男子菩薩有一陀羅尼門瓔珞莊嚴云何爲一所謂正念不忘復次善男子菩薩有二陀羅尼門瓔珞莊嚴謂文持義持菩薩有三陀羅尼門瓔珞莊嚴謂於義善巧於文善巧分析善巧菩薩有四陀羅尼門瓔珞莊嚴謂不著語不謇

齋語分明辯語無雜亂語菩薩有五陀羅尼門瓔珞莊嚴謂知所聞義隨順行故知諸文身隨順行故知了義經隨順行故知於一切補特伽羅音聲法智隨順行故知諸世間出世間法隨順行故菩薩有六陀羅尼門瓔珞莊嚴所謂如所說理而修行故證真起說隨宜演故所言誠諦無詭詎故言常威德不捨大悲說正法故善知根器巧能演說無缺減故得世間智知時而說不非時故菩薩有七陀羅尼門瓔珞莊嚴所謂迅疾辯捷利辯如

意辯無著辯威德辯無錯謬辯一切世間最上妙辯菩薩有八陀羅尼門瓔珞莊嚴所謂善知天語龍語夜叉語乾闥婆語阿脩羅語迦樓羅語緊那羅語摩睺羅伽語人非人等乃至一切衆生語言菩薩有九陀羅尼門瓔珞莊嚴何等爲九所謂處衆無畏摧諸異學說法無畏善答問難知廣大說知隨意說行正直行顯金剛力示現劫燒破著常想說諸乘法成熟衆生是名爲九菩薩有十陀羅尼門瓔珞莊嚴云何爲十所謂善能除斷一切

疑難善知一切廣大法門善得無師自然智慧善說無盡字句法門善說一切圓滿深義善能開示無邊佛法善說無邊煩惱過患善說無量深解脫門善能深入衆生根性善入如來無著無礙辯才智慧是名爲十善男子是名菩薩陀羅尼門瓔珞莊嚴卷七

音釋

醫 鐵古  
勤閔朴猛  
也切石  
齊也胡  
齊音瑞都  
殄珍耳珠  
也疾郎  
捷疾革  
疾葉也  
也切聲  
列聲  
瞬廣

永樂北藏

守護國界主陀羅尼經

第七〇冊